

四庫全書

集部

欽定四庫全書

集部

曝書亭集卷一
一至

詳校官庶吉士臣汪彥博

助教臣常循覆勘

總校官降調編修臣倉聖脉

校對官檢討臣盧遂

謄錄監生臣呂永安

欽定四庫全書

集部七

曝書亭集

別集類六

國朝

提要

臣等謹案曝書亭集八十卷附錄一卷

國朝朱彝尊撰彝尊有經義考已著錄此集凡賦一卷詩二十二卷皆編年為次始于順治乙酉迄于康熙己丑凡六十五年之作其紀年皆用爾雅歲陽歲陰之名從古例也詞七

卷曰江湖載酒集曰茶烟閣體物集曰蕃錦
集禠文五十卷分二十六體附錄葉兒樂府
一卷則所作小令也彛尊未入翰林時嘗編
其行稿為竹垞文類王士禎為作序極稱其
永嘉詩中南亭西射堂孤嶼瞿溪諸篇然是
時僅規撫王孟未盡所長至其中歲以還則
學問愈博風骨愈壯長篇險韻出奇無窮趙
執信談龍錄論

國朝之詩以彛尊及王士禛為大家謂王之才高而學足以副之朱之學博而才足以運之及論其失則曰朱貪多王愛好亦公論也惟暮年老筆縱橫天真爛漫惟意所造頗之翦裁然晚境顏唐杜陵不免亦不可苛論彛尊矣至所作古文率皆淵雅良由茹涵既富故根柢盤深其題跋諸作訂謫辨異本本原實跨黃伯思樓鑰之上蓋以詩而論與王士禛分途各

騫未定孰先以文而論則漁洋文略固不免
瞠乎後耳惟原本有風懷二百韻詩及靜志
居琴趣長短句皆流宕艷冶不止陶潛之賦閑
情夫綺語難除詞閒常態然韓偓香奩集別
為篇帙不入內翰集中良以文章各有體裁編
錄亦各有義例溷而一之則自穢其書今併
刊除庶不乖風雅之正也乾隆四十六年十
月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

提要

曝書亭集原序

秀水朱文恪公以名德著萬歷中諸子姓彬彬繼起號能文章四十年來浙西言文獻者必首朱氏文恪公之曾孫曰彛尊錫鬯最晚出文章之名播海內一旦出諸父之右子考唐史若韋氏杜氏蘇氏崔氏盧氏之屬皆累世為公卿當時史官至為著宰相世系迄于宋代則有若邯鄲李氏魏郡王氏壽春呂氏河南韓氏暨范文正韓忠獻父子兄弟其功名率與國運相終始蓋唐宋

以來其重世臣如是錫鬯少逢喪亂棄制舉自放于山
巔水涯之間獨肆力學古研究六藝之旨于漢唐諸儒
注疏皆務窮其指歸家苦貧依人遠遊南踰五嶺北出
雲朔東泛滄海登之罘所至叢祠荒冢金石斷缺之文
莫不搜剔考證與史傳參互同異其為文章益奇嗚呼
以文恪公之德錫鬯之才不得比于唐宋之世臣而老
于布衣僅以文章自見蓋遇不同矣是可感也錫鬯之
文紆餘澄澹蛻出風露于辯證尤精詩則捨筏登岸務

尋古人不傳之意于文句之外今之作者未能或之先也始順治戊戌予在都下見錫鬯嶺外詩嗟異之康熙甲辰錫鬯過廣陵投予歌詩適予客金陵不及相見丁未始遇于京師中間聚散者不一迨今丁巳予復入京師而錫鬯又將有金陵之行回憶予始見錫鬯詩時忽忽已二十年兩人論交且十有四年而錫鬯與予皆非少壯人矣錫鬯過別予以所著竹垞集屬序予因述其所有感于中者而并道予二人離合之情以遺之錫鬯

其亦有感于子言也濟南王士禎

古今之論博學者不必工于文工文者學不博秀水朱錫堯幼負異才為太傅文恪公曾孫年十七棄舉子業學古文博極羣書既食貧歷幕府則之豫章之粵之東甌之燕之齊之晉凡山川碑志祠廟墓闕之文無弗觀覽故所作文考據古今人物得失為最工而經傳注疏亦多所發明然世之博學者往往其文不工則何也老子曰當其無有室之用天下之理以實為體以虛為用

是故風觸于虛而聲作水激于虛而瀾生博學者惟思自用其實故窒抑煩懣而無以運之且夫鷗鵬之神也水不從南溟風不搏扶搖九萬里則不能自運何者水狹而風卑則其虛也無幾何地而何以運為然且見聞多則私智勝又好以其偶合穿鑿傅會古今之事故其文愈根據而愈畔于道吾觀錫鬯所論說兢兢然必稽于古古人所無有弗道也又必折衷聖賢之理而載籍所未嘗明言者每引伸觸類互推而得其說人之始視

之也若夏雲之起于空中若城市樓觀臺閣車馬之見于海湄乎不見其根本既而求之則皆有以得其確然之故而援古喻今使言者無罪聞者足戒是蓋所謂能以虛運其實者非邪三吳顧寧人汪苔文博學窮物理予最愛其文有根據而錫毫皆與為友虛已以下之相與切劘其學又能出新意自見此其文之日工也夫寧都魏禧

竹垞先生以名高入史館刻其詩文數十萬言既為藝

苑職志矣今年丙寅復輯其已未以來詩若文凡若干
卷集成見示且屬為之序慎行於先生中表兄弟然名
位文章相去絕遠何足以知先生雖然亦嘗從事於文
欲有所就正於先生久矣竊謂唐之文奇宋之文雅唐
文之句短宋文之句長唐以詭卓頓挫為工宋以文從
字順為至昌黎之文進學解自言之矣答李翱書則為
人言之矣李漢李翰諸人又言之矣總蘄不蹈襲前人
一語廬陵推論六藝之華則曰自能以功業光昭於時

故不一於立言而垂不腐而今乃沿襲模擬以空疎不學之材強為無本之枝蔓不幾為古人所笑乎先生於書無所不窺搜羅遺佚爬梳考辨深得古人之意而後發而為文粹然一澤於大雅固非今之稱文者所敢望矣其稱詩最早格亦稍稍變然終以有唐為宗語不雅馴者勿道正始之音不與人以代興之業此慎行所竊窺於先生嘗欲廣諸同好而因舉私見以質之先生者也故辱先生之命輒書此以進之海寧查慎行

詞原序

往壬寅夏日與錫鬯聚首湖上時畫船歌扇午風滌暑
各有詩篇和答倏忽已十年矣中間離合不常錫鬯時
理遊履歷窮邊汾陰之橫吹已遙青冢之琵琶欲咽據
鞍弔古音調彌高而僕且蹉跌不振奔走困頓於四方
不減屈吟而賈賦也頃與錫鬯同客邗溝出示近詞一
帙芊緜溫麗為周柳擅場時復雜以悲壯殆與秦缶燕
筑相摩盪其為閨中之逸調邪為塞上之羽音邪盛年

綺筆造而益深固宜其無所不有也僕髮已種種力衰
思鈍望其旗纛精整鬱若茶墨為之曳屣却走退三舍
避之已嘉善曹爾堪

原夫樂府盛於齊梁倚聲肇諸唐宋雖遞為汎濫難目
同源而揆厥風騷總非異轍是以門前楊柳詎無託興
之風石上菖蒲大有相思之句新歌子夜獨擅新聲舊
舞前溪還誇舊調迨夫月滿秦樓倡新詞於供奉家臨
長信歎麗製于温岐花間蘭畹盡賞才華綽板琵琶別

推風格夢回雞塞難消後主之愁腸斷人間惟有方回
之句柳屯田無慙風雅李清照定冠閨房凡諸作者俱
隸風人吾友朱十天上謫星人間達士弄桓伊之笛姿
致無雙鼓安道之琴風流第一文情欣賞詩律羣推固
已置之名山雲霞蒸蔚試令擲地金石鏗鏘矣然而江
文通之著作別緒居多庾開府之生平間關不少昔年
遠夢曾隔羊城此日思君還來雁塞李陵臺畔詩詠浮
雲太武宮前愁隨明月望昭君之青草能不傷心登秦

女之白樓可無懷古爰歷介推之地更尋尹鐸之鄉寶
瑟晨彈盡是倡家蕩婦錦裘夜獵都為上國王孫未免
有情能無所感託深思于紅豆憂亦中來悲搖落于青
衫泣將何及於是被之小令不無惆悵之詞寫就行波
亦有綢繆之作撫箜篌而意遠彈捍撥而魂消遂使賦
稱鸚鵡更傳寸錦名文湖号鴛鴦爭羨吹簫仙子嗟乎
僕本恨人愁逢錦瑟君為上客雅擅金荃別逾三年時
維九月若邪同汎曾聞越女之歌碣石相逢重覓燕王

之館悵飛花于大道何處狂遊記殘曲于當壚難忘送
酒舞同鸚鵡誰憐落拓之人句是珊瑚終屬清狂之客
用為此序聊代紅牙敢附高文永垂黃絹吳江葉舒崇
蕃錦集原序

自嚴儀卿論詩別唐為初盛中晚高廷禮遂按籍分之
同一開元也或為初或為盛同一乾元大歷也或為盛
或為中論世者因之定聲律高下予嘗惑之近見同郡
朱錫鬯集唐人詩為詞取而讀之不能辨其為詩中之

句又何初盛中晚聲律高下之殊焉乃知拘方之論不足語於賞音者也而予之惑庶幾可釋已乃編為二卷為鏤板以傳好事之君子嘉善柯維禎

欽定四庫全書

曝書亭集卷一

翰林院檢討朱彝尊撰

賦

謁孔林賦

粵以屠維作噩之年我來自東至於仙源斯時也壇杏
花繁庭檜甲圻元和之犧象畢陳闕里之榛蕪盡闢旣
釋采於廟堂旋探書於屋壁乃有百石卒史導我周行

牽車魯城之北縶馬洙水之陽即大庭之遺庫循端木
之故場驕孫祔兮居前聖子藏兮在左自黃玉之封緘
閔幽宮而密鎖隕長鯨兮不驚懾祖龍兮遠禍除荆棘
之叢生罕翔禽之飛墮雨露旣濡遲景東隅整衣裳之
肅肅正顏色之愉愉展謁方終誕尋往蹟超白兔之深
溝撫青羊之卧石爰有草也苞著其名守之以龜一本
百莖我求其德洵圓且靈爰有木也題之以楮非柏非
縱靡癭靡廡歷千禩而常新貫四時而不改惟先師之

遺澤道莫著乎六經配光華于日月若迭奏之琴箏降
而後儒各事采獲中文古文之書先天後天之易目鄭
衛以淫邪誣春秋以深刻藐往哲之嘉謨恒末師之是
則滔滔天下後死其悲安得起素王於泉壤操筆削而
正之我思古人恥同汚俗或六聘而收身或三詔而逃
祿或依李充之山或就張超之谷潛戶壁于服虔變姓
名于梅福入源水兮栽桃隱丹霞兮種竹詎如此地桑
海不遷可游可息有歌有絃耳不聞僧尼之魚板目不

觀旗鼓之樓船樂土樂土速營一廛願為林戶躬耕墓
田庶幾近聖人之居讀聖人之書將不得為聖人之徒
也與

春蒐賦

皇帝御宇十有八年握金鏡運玉璇超百王之聖域漱
六藝之神淵德無遠而勿屆聲有濯而彌宣舞兩階之
干羽靖萬里之戈鋌雨洗炎洲之瘴波澄閩海之煙聿
將秩祀衡岳底定巴滇猶克嚴夫武事洵無逸而有度

乃

命僕臣乃

召司馬選丞徒以大蒐諏吉日於小雅晉鼓則百二咸
陳虞旌則東西來下車鏤象以煇爛駟飛黃而白赭風
清紫陌之塵天濶黃圖之野於是乎駕六駿從百官建
九旒總三單經長楊陟上蘭遵路直從橋安歷平原之
廡廡瞻秀木之丸丸雲霏霏兮五色山磊磊兮層巒斯
時也穀雨新晴暮春之序劍乍捧乎金人觴甫浮於鶴

羽亞繁杏兮山郵舒崇挺於野圃藥苗則的的依闌菖
葉則青青被渚粉颺鳳子之衣綠潤桐孫之乳雉角角
兮晨飛鳥啞啞兮晚翥兔趯趯兮淺草之叢鹿呦呦兮
平林之鳴爾乃刷霧鬣騰風髮擊鷺鳥搏毅蟲落驚雌
駭高雄輕裘兮不御暄景兮方融釋其一面之網射以
九和之弓三驅兮四牡一發兮五縱於馬斂綏章徹表
豹張幔城羅藻帟息蔭乎高林容與乎秀澤數獸計鮮
犒勤讚獲大庖不盈

乾心有懌用訓儉而昭仁豈丘崇而山積調六膳而作
甘飲三漿其如液則有飛龍之舸鳴鶴之舟梁排雁齒
水漲鴨頭和迴波之妙曲詠在藻於中流沙停振鷺權
起眠鷗白魚湧躍黃鵠翔留勝昆明之習戰與華林之
沂遊於是川后效珍河宗輸寶山出醴泉地生朱草鑄
十鼓於岐陽列三山於蓬島

天子師湯文之裕民法軒轅之訪道省四野之耕農問
百年之耆老照華薄以春曦浹恩膏於靈沼爭擊壤兮

康衢永銷兵兮海表在昔成王繼序四征弗庭既巡侯
甸萬國咸寧暨漢文帝邊宇肅清猶選良家於六郡躬
戎服而治兵稽春蒐之盛禮允治世之大經豈其賓客
是燕乾豆是營惟居安而必慮斯坐致夫太平敢擬廣
成之頌用垂休美之聲

太極圖賦

原夫黃牙欲發蒼精未垠一氣融結萬象胚渾馮馮翼
翼烟烟煜煜睢睢盱盱緜緜分分旣龐鴻之莫坻何聲

臭之可聞量則包夫清濁質斯合乎昭昏謂虛無而有
象運妙有而無鄰鴻靈幽紛泰貞蠢闢混成天地之先
互藏陰陽之宅觀動靜兮無端占迴游兮不隔譬水車
之恒轉類果核之未圻爾其理則貫一象實函三白麟
之書莫吐赤雀之錄未銜名雖傳乎十翼義尚晦乎周
聃啟華山之妙蘊藉營道之幽探种穆祕師授之說朱
陸滋異同之談至希至微無偏無側一翕一施半白半
黑外若離坎中如含蘆萬物於焉化生五行之所糾纏

成能設位圖往鏡來化一氣甄三才天根啟月窟開悟
儒言於冥蹟允經學之倫魁乃知聖人能備全體先知
可詔後覺大道為事物之母

天子有簡能之學用廣運而不窮信範圍之非邈願永
繪於丹青方金鑑之在握

夜明木賦同澤州陳侍郎作

皇帝避暑於興州時維昭陽大淵獻之秋尋捺鉢之舊
蹟啟帳殿於仙陬六屯內肅千廬外周雲容容兮四合

水泱泱兮交流風颭颭兮徐來雨霏霏兮乍收爰有物
焉星芒遙逗明滅露螢之尾吐吞火雞之味謂野燒而
不延疑神燈而未輟迺

命俞騎即而視之是為魔木有枿無枝黝同桴炭澀若
榴皮如場之轉碌碌如絳之拽豐碑載以堅車駕之健
犢入重關度平谷選郢匠以運斤俾奄人以司局舍料
上槁存堅多心近

天顏兮咫尺位祕宇之崇深鑽不勞兮司燿燎無灼兮

烘煨等壁夜光類珠宵映方角枕而輝盈比風簾而神
定四照儷若木之華 六宮擬賓連之慶豈非

聖德之咸臨固無遠而弗鏡宜坤珍之畢效雖枯木朽
株亦疇德而瑞

聖

省方賦

歲在甲子歷應上元

聖化翔洽東汜西崑九州之外郡縣重譯而至橋門嘉

穀駢穗濁河澂源於時山祇望

幸臣庶上言請欽柴以郊望或奉符而封巒

天子思省方以設教用求莫而監觀踐六十四民之遙
迹省七十二后之彌文吉日旣諏

德音斯布蠲六軍所過之租減四方惟正之賦推

湛恩於槐宸霈解澤於棘路神人交贊遐邇樂附願儲
祉以慶成共希光而景驚迺以九月辛卯農事備收七
騶始駕百工方休扈千官於

行所勒五營於道陬旣伯旣禱爰豫爰遊承曲璫之璇
蓋建太常之辰旒導以金鉦瓊釵驂以紫燕玉蚪鳴葭
而雲韶並和駐罕而星廬外周黃圖三輔青壤千里濟
鬲津以無波履平原其如砥則有單椒秀澤之山側坎
飛輪之水橋號鵲華湖名蓮子踰歷下之舊城尋介丘
之遺趾美哉左海山有岱宗閭啟仙人之石官存大夫
之松天雞鳴而躍日

宸駕至而呼嵩徹稽席蒲車之制罷泥金檢玉之封於

馬訪淮土之仙茅驗吳門之白馬渡河則神獻其寶遵
海而風不鳴瓦泛藻舟於中流息參旗於大野越南究
與南徐溯吳下而白下

帝有思言宣示函夏眺勝國之蒿萊封蔣陵之松楸
德無施而不徧

思未沾者蓋寡由是展軫素王之里致齋金絲之堂陳
元和之犧象循闕里之宮牆懸車在廟遺硯在牀肅拜
杏壇之上翔步檜庭之旁洵禮隆乎三古而事冠乎百

王衡律既同秩祀有典振旅則邇考祥斯遠覽四瀆而
經五州乍六旬而還輦

兩宮交悅萬姓齊忭粵若稽古時致太平必命掌故登
封告成或紀社首繹繹或禮云云亭亭石撼石距之狀
金匱玉匱之形祺安禪安之樂封壇覲壇之銘莫不雲
連帳殿雷動山庭未有諮詢疾苦彰瘡濁清不警不蹕
不震不驚凡高年之耆老尺口之童嬰婦子所集商旅
所經咸得覲

天顏於咫尺瞻仙仗於郊坰至若

天縱之能溢於筆墨月壁星珠寶題靈式鸞蹤鳳藻被
物成飾轢唐帝之八分陋宋宗之飛白扁榜峩峩發舒
心畫蔭之華棖勒之貞石誠與日月雲漢共昭垂於無
極者也

湘湖賦

歲柔垓困敦兮是月維陽辭鑑水之一曲兮言歸故鄉
遵大路于蕭山兮猶勾踐之舊疆舍予舟于城闕兮別

問渡于陂塘踐荒塗之幽僻兮山是越而湖湘圍列岫
之周遭兮匯一水于中央葶絲苻帶齊消歇兮澄百頃
之波光相茲湖之寥闊兮溯蒼蒼之葭葦漾輕舫而如
所如兮逾五里而十里鮮澤農之耕作兮但眾師之棲
止雉角角以飛鳴兮鷺娟娟而停峙瞻牛頭與苧蘿兮
信不遠而伊邇愛山川之清淑兮斯生長夫西子洵明
艷之絕倫兮直夫差之一死以餘暨為諸暨兮驗往牒
之非是眺越王之故崢兮丁國步之迍邐會稽不可保

兮稱臣妾而播遷游臨江而祖道兮秦哀曲于烏鳶迨
返國而渡三津兮惟八臣四友謀猷之後先既十年而
生聚兮更教訓之十年簡俊士之四萬兮率君子之六
千誕一舉而沼吳兮齊衣錦而師旋讎九世而當復兮
豈身耻辱而忘焉志既立而轉死為霸兮胡後之人獨
不然他山難久留兮問西陵而前路夕既濟于錢唐兮
尚踟躕而迴顧徒弔古而慨慷兮惜年歲之遲暮

水木明瑟園賦 并序

僕生平不耐作賦雖以賦通籍非稱意之作不存也康熙甲申八月陸上舍貽書相要過上沙別業遂汎舟瀆取道靈巖以往抵其閭則吳趨數子在焉愛其水木明瑟取以名園上舍延賓治具飲饌豐潔主客醉飽留七日乃還念勝引之難再也成賦一篇先民有言人各有能有不能賦非僕之所能也辭曰

度十畝之地葺宅一區止有阡而可越潭分沙而不淤翦六枳而捷蕃因雙樹而闢閣嘉水木之明瑟愛徑吟

之盤紆山有穴而成岫土戴石而名岨巖兩判而得路
萼四照兮盈株園之主人則陸生稹也匪聲利是趨惟
古訓是茹鼓枻而吟帶經以鋤不隱不仕無礙無拘良
辰旣煖爰遣莊奴筆疏告吾商飈乍肅赫暑早祛葵傾
芳步素秀華芙桂英粟綻阜莢條麤苔縛厥帚鎌刈其
蕪井汲鉞綆牀轉輓轆靡塵不滌靡穢不除可以談讌
可以歌歛夫子惠顧跂屨無虞於是竹垞一叟誕發僧
廬遵彼橫塘津逮岑隅風塘傘竹日漏衣袂亦有同調

數子素心相於水抽其帆陸捉其車不速而集笑語軒渠離坐貫坐或跏或趺生也敕中厨封兩踰誠食饌之次第傳方法于腰胸乃羹乃淪間以脯牯藪則有蒲鮓則有菹擘翠房之鮮酌剝紫芡之員珠旋棊改令覆斗傾盃倒李路之十搯慕宣尼之百觚生起避席顏色數愉稱園雖小聊可以娛夫子賦之可與否與叟曰可哉吾思魯鈍毋疾而徐於馬閉關納屨自晨及晡拂几案屏翬能挹勺水注蟾蜍默聳羸肩潛將短鬚雖有千慮

終成一愚譬如奏事四足而非馬書券三紙而無驢爾
乃舍左思之席溷投鍾繇之筆拊循蘭陵踐椒塗躡聽
雨之樓梯登升月之窻迳流覽帷林蕩漾方壺心傾意
寫志豁神攄留宿宿兮信信忽便便兮諸諸而曰猗茲
園之怡曠兮經夫差之故都駐我馬于高岡兮想越來
之師沼吳傷西子之不作兮徒憑弔于交衢聆寶屨而
聲銷兮剩紅心之草鋪嗟宮牆流水之入兮驗妖夢之
非誣既上山而下山兮復自田而之湖回瞻巖椒之夕

陽兮挂霄漢之浮圖逼茶隴之葱青兮占稻田之豐腴
耘雖資乎疆以兮穫免發彼租符眺松臯之明秀兮步
衡薄而跼蹐辭八門與七堰兮遠肥膩之姑蘇望之叢
叢翁鬱即之羅羅清疎旣外隈而內隩亦前渚而後沮
磴希偏側丘不崎嶇澗無飲虎穴少潛狙石梁緩度坦
坦舒舒春則桃李殷夏則筍白櫻朱萼一丈兮爛漫
香五木兮紛紛敷架層闌之曲录刺不慮夫牽犁又有同
心宿蕙並蒂新蕖未八月而剥棗先九日而囊萸野芳

斷兮復續湛露晞兮更濡訝鷓鴣之撲鹿縱烏鳥之畢
逋喈喈楚雀汎汎江鳧雀則有穀鳧則有雛翠羽定巢
而不去文鱗在藻而忽徂非無牛宮豚柵麋茅兔罝羝
藩鹿若雉艾雞笈螃蟹設斲鱸鮪施罟寧寬便了之僮
約而免責其辛劬彼玉山之仲瑛暨光福之良夫連峯
列岫夾澗通瀛豈若斯之一丘一壑不見其隘而祇見
其有餘且客獨不聞茲園經理之初邪曩有高士蜚遁
山屨履穿東郭面垢左徒垂蘆簾于紙閣然蒨葉于瓦

壚朋慵迎兮勿送戶罷闔而不逾柏雖生兮上槁桐已
醜而无膚斯人去兮猿鶴散幸茅亭之尚在對魚幢之

咫尺而轉覺其空虛生乃取介白之遺字

吾鄉徐高士
白舊居于此

上舍請崑山徐吉士昂發
大書介白之亭扁縣之

縣肇窠之大書志先民之軌

躅作後學之範模豈非仁心仁術視富貴利達買宅者
攸殊今吾與諸子飲食宴樂于此倡予和女安知後之
遊者觀題壁之作不曠世而相感誦清風之穆如重為
告曰四坐莫諠吾言不渝諸君卜築近在郊郭吾獨寡

寥栖小長蘆目極百里何山可居相生之宅其樂只且
兄分布被母御板輿婦采蘋而米繁子耕菑而耕畬烹
泉則京挺都籃並載入市則修琴賣藥非迂郊關一舍
而近津渡扁舟可呼行不苦于趙趙策不藉乎翼扶我
舟弗勞我僕免痛訪翠墨而椎拓捐黃卷而流輸凡靈
威所守唐述之儲莫不籤題置筭裝界開圖爾雅釋寓
齏之屬離騷箋草木之疏僕雖耄矣耽與道俱奇文疑
義猶冀相須友直友諒為德不孤思載家具旁生層櫺

卜鄰晨夕我與爾夫

攜李賦 并序

嘉興古之攜李也。攜遵為切。許慎說文解字從木有所
擣。賈思勰嫁李法臘月中以杖微打。岐間正月復打之。
足子殆擣之。義與府治西南二十里。舊有攜李城。今蕪
沒。李惟縣東十里淨相寺有之。近苦官吏需索。寺僧多
伐去。將來慮無存矣。考之圖經俱不載。因體物成篇。辭

曰

植物有李兮應玉衡之星精受命南國兮特以樵名產
維揚吳會之交兮載于魯春秋之經既殊河沂之黃建
兮亦不類房陵之縹青夙傳九標之稱允宜五沃之土
自空城之蕪沒邈淨相之梵宇獲要術于齊民授靈方
于老圃甄著樹以分歧犁不耕而用拊當其溫風始至
法苑徐開井上勿遺螭食林間恰有禽來價方高乎朱
仲種不讓夫顏回果熟偏蕃枝低易拜漿均玉乳之梨
品勝紅雲之柰相珍果之離核縣弱縷而虛中異懷仁

之挑杏必待嫁而分叢宜登玉盤宜沉冰水雪素蕩而
並陳配甘瓜而兩美傳諸故老一事矜奇遇入吳之西
子臘脂之匪舟移經纖指之一掐量心賞之在斯何造
物之工巧分化十億于來茲雖彼美之云亡兮髣髴若
或覩之人情重故鄉兮雖小物而增慕矧俊味之得嘗
兮信土產之有素悵圖經未之及兮迺宣豪而作賦

曝書亭集卷一

欽定四庫全書

曝書亭集卷二

翰林院檢討朱彝尊撰

古今詩一

旃蒙作噩

村舍二首

村舍朱生感遇作也生年十七為贅壻避兵五兒子橋
村舍有牛宮架以曲尺木犛牯盈四三戀此共泥伏牧

童驅使行跨之上原陸日夕齊下來各自舐其犢吾生
命不辰早歲去邦族父母謂他人安敢望拊畜吁嗟犢
不如寢訛從所欲

村舍有雞柵樹近蓬門樞曉日披其樊一雌將衆雛村
媪導之前握粟呼朱朱當前或更却母啄子必俱吾生
早離家南北忽相踰父母謂他人衆中益羈孤吁嗟雞
不若骨肉長相須

夏墓蕩二首

夏墓蕩前停釣輪
荒溝極浦易迷津
夕陽滿地北風起
飛遍蘆花不見人

干戈靜處見漁師
羨爾桃源信所之
豈意义魚艇子集
殺機不異銃頭兒

過丘生

丘生避地夏湖曲
獨伴流泉結書屋
茅柴酒薄留故人
破甑夜燒風折木

柔兆閹茂

曉入郡城

輕舟乘間入繫纜壞離根古道橫邊馬孤城閉水門星
含兵氣動月傍曉煙昏辛苦鄉關路重來斷客魂

悲歌

我欲悲歌誰當和者四顧無人斃斃曠野

過吳大村居

泛舟經谷口迢遞入林端一徑野煙夕孤村返照寒榴
花赤瑪瑙竹色青琅玕滿酌主人酒休歌行路難

漫感

淮陰昔未遇旅食昌亭年薄俗愛惜費晨炊固宜馬哀
哉趙元叔日歎囊無錢男兒雖落魄寧受衆目憐相逢
游俠子白馬黃金鞭揖我入酒家飲我斗十千臨觴忽
不御拔劍心茫然

暝

暝投人外宿桑柘藹陰陰獨樹歸禽少平川隱霧深松
篁初月上鐘磬夕陽沉漸覺微風起寥寥山水音

平陵東

平陵東蒿艾蓬爾為誰劫義公縱者金伐者鼓縛義公
大旗下帳前力士頭虎毛傳呼欲下五尺刀如可贖君
歸賣白馬我歸賣黃犢

強圍大淵獻

捉人行

步出西郭門遙望北郭路里胥來捉人縣官一何怒縣
官去邊兵來中流簫鼓官船聞牛羊橐駝蔽原野天風

蓬勃飛塵埃大船峩峩駐江步小船捉人更無數頽垣
古巷無處逃生死從他向前路沿江風急舟行難身牽
百丈腰環腰環環過杭州千人舉擢萬人謳老拳毒
手爭毆逐慎勿前頭看後頭

馬草行

陰風蕭蕭邊馬鳴健兒十萬來空城角聲嗚嗚滿街道
縣官張燈徵馬草階前野老七十餘身上鞭扑無完膚
里胥揚揚出官署未明已到田家去橫行叫罵呼盤飧

闌牢四顧搜雞豚歸來輸官仍不足揮金夜就倡樓宿

北邙山行

北邙山前望行路素車白馬紛朝暮誰家丘墓樹龍窠
白楊粉檟松柏桐黃金為甍石為馬魚燈熒熒照泉下
古碑崩剝無歲年後人於此犁為田雄狐僦僦免瞿瞿
人聲夜哭烏聲樂

春晚過放鶴洲

問訊裴公島春來幾度遊古牆修竹上潭水落花浮煙

雨無人境山泉放鶴洲鷗夷今不見往事問漁舟

雨後即事二首

暑雨涼初過高雲薄未歸泠泠山溜遍浙浙野風微
日氣晴虹斷霞光白鳥飛農人乍相見歡笑款柴扉
一雨平林外羣山倚杖前蛙聲浮岸草鳥影度江天
鳴磬上方寺揚帆何處船坐疑秋氣近蕭瑟感流年

野外

野外踈行跡深林客到遲江湖殊後會風雨惜前期
秋

草飛黃蝶浮萍漾綠池南樓夜吹笛寥落故園思

舟經震澤

澤國東南遠樓船舊荷戈明霞開組練惡浪走蛟鼉橫
海將軍号臨江節士歌重來已陳跡歎息此經過

著雍困敦

董逃行

我欲上登崆峒謁見仙人韓終兩驂白鹿雲中輕車超
忽西東駕者何人木公旁有千載玉童耳長覆髮丰茸

天門闢者蘇林復開閭闔招尋青藍紫桂成陰清風細
雨吹襟提壺設席盃簪蒼龍白虎交臨投壺六博無方
中筵促坐芝房有美一人清揚輕軀暢舞洋洋宛若龍
游鵲翔清歌妙曲難忘四坐歡樂未央曈曈日出搏桑

五游篇

崑崙有鳥自名希有東覆木公西藏金母一解飄風東來

吹我西征路從弱水阿母未經二解雲車隆隆土鼓逢逢

道逢仙人言葬雷公三解河鼓渡河天孫設食奔星馳驅

不見太白

解四

方丈之山其高五千羣仙往來不願升天

解五

少年子

臂上黑彫弧腰間金僕姑突騎五花馬射殺千年狐

雀飛多

雀飛多飲啄野田裏奈何卒逢黃鷄子誰其救者彈以丸
何用報君雙玉環玉環如可得
不惜黃花與爾食

獨不見

青樓百尺狹巷旁中有桂樹臨高堂啼鳥自將八九子
鳴鶴散立東西廂情人碧玉小家女快馬瑯琊大道王
陽春三月獨不見夜如何其守空牀

曹三秀才

山秀

讀書馨菴同吳大藍訪之遇雨

留信宿

故人多寂寞而子寄僧房不見長相憶因之暫裹糧野
雲停曲几涼雨滴虛廊欲問歸津渡蒹葭一水長

晚

白屋生寒早蒼煙向晚陰松門清磬遠楓岸夕陽深坐
聽農人語多諳靜者心荆扉猶未掩倚杖數歸禽

題項叟

聖謨

畫柳

吾家舊宅由拳北恰與胥山樵對門巷柳蕭條今已盡

春風猶喜畫圖存

胥山樵項叟自號也

屠維赤奮若

春江花月夜

今夜江中月兼花照水濱春潮寒不起定有弄珠人

芳樹

芳樹不知名當君階下生
三春三月暮一雨一番晴
看舞山薜曲聽吹玉笛聲
相思人不見終日遶花行

擬古

東鄰有女自名碧玉問年幾
何三六未足言采桑不盈一
斛愧無南珠以慰心曲原田
有雉艾而張羅愛而不見傷
如之何

靜夜思

靜夜涼風天氣清
開軒白露滋
前楹憂人佇
立愁屏營
仰觀北斗懸
高城浮雲飄
忽蒼煙平
誰家青樓歲
筵鑰
月寒沉沉夜
飛鵲

阿那瓌二首

黃塵起跣跂
乃自渭橋過
小袖織錦袍
足踏深雍鞞
問客家何方
揚鞭兩走馬
四角白虎幡
招搖來闕下

那呵灘

聞歡當遠行
泣下不可止
大編開江津
懊惱鐵鹿子

烏棲曲

天河漫漫月流光錦筵紅袖燈輝煌城頭烏棲夜擊鼓
吳王更衣西子舞

同作

嘉興王翊 介人

深宮烏啼天未旦城頭擊鼓明星爛吳王讌罷星已
希繁霜落樹烏驚飛

劉生

京華多俠客勇略重劉生一劍酬然諾千金問姓名歌

鍾喧北里冠蓋隘東平聞道龍城戰軍前更請纓

當壚曲

吳姬春酒解當壚隨意絲繩瀉玉壺五馬漫誇秦氏女
雙鬟愁殺霍家奴

小長干曲

江水東流急風波正未安郎今何處去留妾小長干

上章攝提格

同沈十二詠燕

節物驚人往事非
愁看燕子又來歸
春風無限傷心地
莫近烏衣巷口飛

夏至日為屠母壽

臨高臺將進酒
君提壺我鼓缶
君子且勿諠
小人鼓缶歌
一言我昔從東海上親
見上元夫人指爪長鬢髮
翩翩吹瑤笙
擊石鼓宴者誰有金母
投壺玉女為客豪
青蚪白鹿相招邀
鍾山之李綏山桃李如餅桃
如斗得而食之皆老壽
今日高堂上壽稱觴
一年三百六十日

金史四庫全書
卷二
三百五十九日無如此日長

夏日閒居二首同范四路作

蘭草羅含宅蓬蒿仲蔚園桐陰初覆井瓜蔓漸踰垣歸
鳥檐前樹斜陽嶺上村無家味生計漂泊信乾坤
草閣親魚鳥江天滿芰荷行吟多澤畔晞髮自陽阿傍
水看垂釣因風聽伐柯高陽尋酒伴乘醉亦來過

放言五首

長門賣賦司馬秦市懸書呂韋吾生恨不能早手載其

金以歸

步兵真成老卒德祖亦是小兒功名豎子先遂詩賦壯夫不為

高士南州磨鏡大夫吳市吹簫男兒不妨混迹何用匡居寂寥

為文思以冢葬對客寧將硯焚當年必無鍾子後世定有揚雲

種南山一頃豆瞻西疇三徑松耕桑若得數畝吾豈不

如老農

八月十五夜望月懷陳大忱

明月生滄海，天橫一氣中。
遙憐今夜客，相對與誰同。
應有良朋過，銜杯學孟公。
思之不得見，清露小庭空。

贈諸葛丈

旅館張燈夜未央，相逢跋扈少年場。
同來大道朱樓上，並坐佳人錦瑟傍。
白首悲歌非往日，青春把酒是他鄉。
襄陽耆舊今寥落，乘醉還須問葛疆。

懷鄭珣客淞江

連江楓樹外煙水隔層波歲暮饑寒逼荒城雨雪多故
人居谷口策馬去山阿幾日離居恨還應獨嘯歌

寄家孝廉一是

懷歸當歲晏木落徧江潭作客應相憶離羣自不堪陰
風連晦朔寒日下西南早晚依同病窮愁意亦甘

重光單闕

春日閒居

幽棲城市隔好鳥亦來翔閉戶野橋畔讀書春草堂有
時欹阜帽終日據繩牀且貰鄰家酒狂歌盡一觴

懷朱山人扉

別時桂樹秋相送衡門下不見所思來春水生堂下

語溪道中

小縣初成市經春罷荷戈陂塘湖水緩桑柘石門多入
饌鴛兒酒愁人阿子歌見吳兢樂府解題蒲帆十八幅一半客

經過

東飛伯勞歌

伯勞飛來燕飛去參辰天上重相遇誰家女兒十五餘
織成湘綺三條裾迴身微步乍生塵巧笑明眸善避人
鬱金為堂桂為柱中庭新種相思樹陽春已暮花漸稀
可憐高下從風飛

樹萱篇

朱明四五月萱草滿中園花花連枝發葉葉從風翻
移萱南湖濱樹萱北庭側亮無同心人馨香詎相識

解二

解一

兔絲自有枝桃葉自有根黃花特小草何用通慙慙

三解

冶容無故懽柔條易顛倒本是忘憂花翻成斷腸草

四解

休洗紅

休洗紅洗多紅漸白人心初不同愛好非前日紅顏絕
世衆所尤美女入室惡女仇

采蓮曲

采蓮女兩槳橋頭去錦石清江日落時羅裙玉腕花深
處采蓮童素舸游湖中江謳越吹歌未歇朱唇玉面來

相逢共道江南可采蓮湖中蓮葉已田田攀花風動飄
香袂照水萍開整翠鈿翠鈿香袂逢人少回看蘭澤多
芳草青鳥飛來啄紫鱗白蘋斷處生紅蓼雲起暮流長
飛花鏡裏香雙雙金翡翠一一錦鴛鴦鴛鴦翡翠飛無
數蘭橈並著輕搖櫓素藕連根絲更柔紅蓮徹底心偏
苦誰家年少垂楊下出入風姿獨妍雅岸上徘徊七寶
鞭湖邊躑躅千金馬淶江腸斷起歌聲惆悵方塘一望
平水上輕衣吹乍濕風中細語聽難明沙棠舟繫青絲

絳相邀盡說江南樂
白露初看翠蓋飄
秋風漸見紅衣落
橫塘燈火采蓮歸
隔浦歌聲聽已希
雲間月出開煙樹
惟見沙明白鷺飛

寄胡明府

振芳

老去甘垂釣
秋深歎轉蓬
虛堂驚蟋蟀
涼露滿梧桐
隱吏思梅福
忘年得孔融
飄零方有日
清宴幾時同

雞鳴

東方未白雞長鳴
離人束帶步前楹
中閨切切再三語

曉寒入室燈光清
家僮驅雞誤相觸
膈膈膊膊飛上屋
讀曲歌

素藕生池中
紅荷浮水面
與汝同一身
本自不相見

華山畿三首

華山畿
弩張不發箭
知子未投機
兩相望
儂非孤
矢星安能長
對狼
奈何許
安得鳳凰子
迎接儂與汝

游仙三首

東土非吾好西征豈憚勞何能從桂父且自學盧敖入
水騎龍竹耕煙種鴨桃不知閨風去員闕幾重高

八桂何時植雙鸞此日鳴然犀分水族懸鏡照山精片
石臨河見浮槎貫月行心知逢織女不待問君平

少小璇宮織當牕機九張天孫分重錦價直百千強欲
渡明河去牽牛不服箱謫來北斗下無計挹天漿

臣里

臣里東家子生來十指柔已矜能挾瑟不自解梳頭蠟

淚挑珠鳳風簾控玉鈎日長消午夢鬪草及春游

玄默執徐

南湖夜聞歌者

輕舟暗度古城東惆悵霜天落塞鴻誰向夜深歌水調
傷心不待管絃終

舟次平望驛

舟人爭利涉日夕更揚舠一水分平望羣山接洞庭風
來潮約約煙積雨冥冥愁聽嚴更發中宵尚未寧

楓橋夜泊

初月開平林繁星羅遠戍驚鳥沙上鳴漁子夜深語遙
聞歌吹聲暗入楓橋去

治平寺

招提下山路一徑轉迴塘塏影開初地鐘聲出上方陰
崖深樹綠斜日亂峯黃湖上扁舟興沉吟意不忘

中峯尋

讀徹

上人不遇

中峯藤蘿上亭午傳齋鐘無復憚長路因之策短筇山

明石齒齒樹暗雲容容不見支公鶴相隨塵外蹤

白紵詞二首

吳王宮中夜欲闌秋江露白芙蓉殘青娥二八羅裳單
左鈿右鈿何娑盤明星滿天月三五城頭坎坎夜擊鼓
君王既醉不知音猶向燈前作歌舞

天橫北斗夜沉沉美人並進揚清音白紵輕衣香氣深
玉釵亂墮無人尋此時但恐君恩竭急管繁絃那能歇
明燈忽滅烏夜啼醉起更衣滿江月

江亭

揚柳官亭外春來送客頻傷心車馬地淚盡復生塵

古興二首

空井雙桐落葉深銅餅百丈響哀音美人不見涼風至
愁對秋雲日暮陰

羅生芳草綠汀洲少婦明妝北渚游日暮清歌何處發
蘋花秋水木蘭舟

哭萬兒

提攜猶昨日鬢髯憶平生夜火銅盤淚春風竹馬聲無
錢輕藥物瀕死念聰明迢遞黃泉道沉沉慟汝行

送王翊游粵

好去年城道吁嗟契濶深離羣空悵望惜別重登臨零
雨哀南土晨風念北林征途祭酒客天末渡江吟煙火
蠻鄉少山雲驛路陰枕椰交嶺樹孔雀擾家禽去問楊
孚宅歸看陸賈金梅花如可寄幸慰故人心

立秋後一夕同睦 修季 俞亮 朱一 是 繆永謀 集

屠爨齋

涼風吹細雨蕭瑟度庭陰把袂來何暮當杯夜已深天
邊同落魄江上獨愁心誰念新亭淚飄零直至今

送袁駿還吳門

袁郎失意歸去來彈鋏長歌空復哀天寒好向汝南卧
酒盡誰逢河朔杯遠岸楓林孤櫂入平江秋水夕陽開
要離墓上經過地知爾相思日幾迴

題畫四首

林深屐齒未曾經萬壑松濤偶坐聽我若支筇來此地
便攜酒榼上茅亭

綠蕪遠近山參差露氣暗浮松樹枝烏蓬七尺屢回首
看到月明歸未遲

長林楓葉早霜催絕磴鳴泉激石迴料得山樓聽不盡
絃桐欲寫又徘徊

竹梢藤蔓淨飛沙冷翠疎林不著花羨殺幽人此高卧
更無剝啄到山家

集句題王女史畫蓮

可愛深紅間淺紅
滿池荷葉動秋風
縈迴謝女題詩筆

一片西飛一片東

昭陽大荒落

即席送王

廷璧朱士稚
同之松江

揚柳青青覆板橋
春江花月夜生潮
停杯又是他鄉別
無那相思一水遙

遣悶

一雨竟十日蕭條成暮春歡娛那有地歲月漸過人煙
草天邊路風花陌上塵良游如可再尊酒莫辭頻

閒情八首

邂逅重門露翠鈿娉婷不嫁惜芳年徒勞暇日窺香掾
漫想橫陳得小憐洞口桃花何灼灼江南蓮葉更田田

輸他三戶人僥倖載上胭脂匪畔船

胭脂匪在攜李相傳范蠡載西施處

生來里是比肩名兩美須知定合并北地佳人矜絕世
西隣名士悅傾城何緣珠樹成連理便擬香車駕六萌

不分秦臺漏消息玉簫先有鳳凰迎

家臨大道不難知
夾岸揚枝踈地垂
春水白魚多比目
秋風紅豆最相思
飛龍藥店虛存骨
走馬章臺孰畫眉
多事定情繁主簿
山南山北淚連絲

宛轉吳歌別有腔
蜻蛉舟小露紅窻
梅花日暮風吹樹
桃葉春深夜渡江
荀令香消煙杳杳
何郎燭暗影幢幢
思憑謝女題詩筆
畫作輕鷺六百雙

蓮花細步上蘭階
徐整同心七寶釵
入室便應金作屋

當壚須得酒如淮
身前容易風吹袖
夢裏分明月墮懷
五角六張看過了
何愁作事兩難諧

舍後方池一水流
鴉鵲驚信沉浮從
教露井生桃樹
更遣中庭種若榴
錦段未通千里字
玉簫猶隔幾層樓
不知桑葉城南路
五馬寧能共載不

水北花南路不紆
形相色授兩心輸
莫須遠結千絲網
且緩平量十斛珠
大婦亦憐中婦豔
新人定與故人殊
鴛鴦有分成頭白
肯許飛還野鴨俱

一自神珠別漢臯經春不見意徒勞門前種樹名烏臼
水上飛花盡碧桃三里霧同千里遠九重樓恨十重高
無因得似紅襟燕恣拂簾鉤日幾遭

渡黃浦

極浦連天闕驚濤壯海門揚舲辭驛路放溜入雲根白
霧魚龍伏蒼煙日月昏樓臺朝作市雷雨暗翻盆疏鑿
千年久舟航萬里奔摩霄盤野鶴吹浪湧江豚杳渺通
長島虛無出遠村祠因黃歇起葺以陸機存上客今何

在高文不可論，乘槎應未得。搖落問乾坤。

龍潭曉發

曉發白龍潭，移舟綠楊岸。篙師暗中語，行客水邊飯。雞鳴潮始來，月落天未旦。冥冥煙霧生，稍稍城鴉散。乘風萬里外，擊楫中流半。慷慨游子心，臨江起長嘆。

嫁女詞

啞啞重啞啞，鴛鴦隨野鴨。誰家可憐窈窕，容顏精妙。難意量大姑生兒，仲姑嫁小姑。獨處猶無郎媒人，登門。

教裝束黃者為金白者玉阿婆嫁女重錢刀何不東家
就食西家宿

七夕詠牛女二首

浪傳靈匹幾千秋天路微茫不易求今夜白榆連理樹
明朝銀浦斷腸流

瓜果中筵笑語微西樓涼月夜開扉無因得泛浮槎去
親向天孫乞巧歸

南湖即事

南湖秋樹綠放權出迴塘簫鼓聞流水蒹葭泛夕陽心
隨江鴈滅目斷楚雲長惆悵佳人去憑誰詠鳳凰

送林

佳璣

還莆田

高樓置酒觴今夕愁聽驪歌送行客搖落深知羈旅情
飄零況是雲山隔林生磊落無等倫鳳雛驥子誰能馴
一朝忼慨辭鄉里幾載飢寒傍路人平生崔嵬好奇服
流離恥作窮途哭往往詩歌泣鬼神時時談笑驚流俗
林生林生骨相奇昂藏不異并州兒看君富貴當自有

不合憔悴留天涯高秋別我闕中去行李蕭條慘徒御
客舍清江萬里船鄉心紅葉千山樹九里湖邊倚翠屏
穀城山下俯清泠寒風江路兼山路落日長亭更短亭
嗟予分手天南遠惆悵河橋送君返遠客休辭行路難
高堂應念還家晚

送十一叔游中州二首

木葉下亭臯西風一鴈高驅車千里道結客五陵豪
河水浮官渡關門鎮虎牢驪駒方在路尊酒意徒勞

旅館涼風起秋城畫角哀天涯方遠客祖道且深杯
山色陰中岳河流繞吹臺梁園多雨雪歲暮好歸來

送通門和尚住持太白山

越山東望路迢迢澗口寒藤度石橋惆悵空林飛錫遠
海門秋雨浙江潮

送屠爨入閩

故人千里去風雪上行車南浦悲長路西河歎索居江
猿啼遠近天水入空虛莫作經年別高堂正倚閭

逢姜給事

珠

黃門先生官左掖力欲拔山氣辟易虎豹天關閉九重
孤臣血肉徒狼藉東萊蜃市易沉淪南國相逢淚滿巾
青鞵布韞江湖外誰念當時折檻人

簡陳秀才

光緒

幾日秦嘉去應留贈婦篇盤龍明鏡好雙笑玉堂前

長安賣卜行贈吳三

統持

集杜句

翻手作雲覆作雨長安布衣誰比數天涯涕淚一身遙

避地何時免愁苦男兒性命絕可憐實籍君平賣卜錢
身上須繒腹中實長安市上酒家眠酒酣拔劍肝膽露
勾陳蒼蒼玄武暮人生萬事無不有世人那得知其故
揚眉結義黃金臺亦知窮愁安在哉可憐懷抱向人盡
黃帽青鞵歸去來寂寞江天雲霧裏舍南舍北皆春水
龐公隱時盡室去我獨何為在泥滓強移棲息一枝安
百遍經過意未闌復有樓臺銜暮景也從江檻落風湍
多才依舊能潦倒百壺且試開懷抱但覺高歌有鬼神

不知明月為誰好
吾兄吾弟巢許倫
路難悠悠長傍人
可憐為人好心事
終日坎壈纏其身

無題六首

金谷繁華地風流石季倫
量珠凡幾斛買取墮樓人
織女牽牛匹姮娥后羿妻
神人猶薄命嫁娶不須啼
夢逐山頭去身從掌上迴
黃金如結屋先築避風臺
月映凌波韞風飄出水衣
莫教仙犬吠花下阮郎歸
漢臯珠易失洛浦珮難分
不及閒男女肩挑六幅裙

養就芙蓉粉勻成十樣牋相思無別語只解勸歸船

哭王處士 翊 六首

書信傳初到銘旌已在途今來紛涕淚昔別念須臾迢
遞悲長道艱難喪老儒山陽懷舊賦流恨滿江湖

遠道將歸客孤舟返舊林招魂迷楚水卧病絕英吟夢
裏羅含烏囊中陸賈金猶憐別時語悽斷故人心

江海飄零日秦川喪亂餘淒涼蒿里曲生死秣陵書零
雨沾青草高原哭素車南山桂搖落無復子雲居

知己從今少平生負汝多人生看到此天道復如何流
水笳簫曲悲風薤露歌王猷竹林在舊徑不堪過

落日明丹旆飄風卷總帷途窮偏作客身老獨無兒書
籍今何託人琴不可知高山空有調回首失鍾期

相送悲長別還家慘獨行流連簡書札次第念交情自
有篋中作何難身後名泉臺應快意未必似平生

曝書亭集卷二

欽定四庫全書

曝書亭集卷三

翰林院檢討朱彝尊撰

古今詩二

閑逢敦牂

同舍人五兄登觀山頂

杖策荒塗外憑高遠樹重微茫開積水縹緲見孤峰細
雨春歸鴈深山日暮鐘何年共招隱相伴入雲松

送王汾遊嶺南

送君西去大江深回首雲煙楓樹林嶺路千山萬山外
相思孤月夢中尋

寄懷徐孝廉之瑞

憶別吳山事隱淪相思煙草歷冬春餘杭溪水空千尺
不見雙魚白錦鱗

贈別王山人元慧

王猷原愛竹圖畫得天真老去貧尤甚年來妙入神與

余情不淺傾蓋日相親
紈扇題教遍屏風
點更新蕭疎

抽直榦蒼翠染叢筠
雨暗瀟湘夕煙浮
鄆杜春枝柯紛

異色水石盡堪珍
國史傳文苑君家有舍人
舍人名絜善畫竹不

苟作嘗退朝默國以雙縑索畫呼之不應至三年始致之又月夜聞鄰人吹簫因圖尺幅與之曰以簫材報汝

其人更求別幅并前畫裂之風流存髣髴清切典絲綸散直矜通籍

吹簫狎比鄰一朝翻毀裂
萬里幾逡巡能事原殊俗
當

時信絕倫昔賢從脫略
似爾實悲辛白髮重湖海
青山

廢隱淪狂歌老藤杖
醉脫小烏巾不厭經過密
惟應歎

息頻物情輕一藝有識定千緡相賞知何地思歸及此
辰郊靡餘舊業雲壑息勞筋早晚扁舟就三江共采蓴

示弟

彛玠

攤書仍不學萬慮亦徒然就市非長策躬耕少薄田請
纓今日事作賦幾時傳莫效諸兄嬾蹉跎媿昔年

即景

遲客無三徑浮杯自獨園林棲堪永日瓢飲坐忘言竹
戶青蟲網荷風翠鳥翻更看涼月上徙倚向南軒

七月八日夜對月

素月弦初直清宵漏轉添
乍堪盈手贈無復兩頭纖影
動明河鵲涼生碧海蟾玲
瓏看不定試上水晶簾

得譚七表兄吉聰西陵書集杜

鰕菜忘歸范蠡船斷腸分手各風煙
更為後會知何地
自斷此生休問天縱酒欲謀良夜醉
將詩不必萬人傳
江山路遠羈離日郭外誰家負郭田

俞汝言移居八首集杜

亂後居難定臨江卜宅新入門高興發對酒滿壺頻為
客栽烏帽呼兒正葛巾平生飛動意披豁對吾真

寂寞書齋裏幽偏得自怡美花多映竹小水細通池丘
壑曾忘返招邀屢有期論文或不媿步履過東籬

田園須暫住版築不時操落景聞寒杵牆頭過濁醪雜
花分戶映亂石閉門高試問垂綸客吾何隨汝曹

簡易高人意村花不掃除日長唯鳥雀客至罷琴書曬
藥安垂老鈔詩聽小胥由來意氣合歲晚莫情疎

卜宅從茲老幽居不用名倒衣還命駕高枕笑浮生弟
子貧原憲諸公厭襴衡看君多道氣攜手日同行

隱者柴門內無村眺望賒圓荷浮小葉秋竹隱疎花帖
石防隕岸傾壺就淺沙何時一茅屋來問爾東家

牀上書連屋庭中藤刺簷看君用幽意勝槩欲相兼棗
熟從人打杯乾自可添此時同一醉與汝定無嫌

滿目悲生事終朝有底忙世人皆欲殺詞客未能忘回
首驅流俗過逢類楚狂吾生無倚著配爾亦茫茫

懷黃十三仄客閩

八月霜清木葉飛
關河秋望淚沾衣
寒山桂樹今搖落
惆悵王孫尚不歸

鷺脰湖寄周四吉亥

鷺脰湖邊水臨流
好結廬桑麻深杜
曲雞犬擾秦餘紅
葉層層樹銀花寸
寸魚耦耕兼有伴
暇擬著叢書

八月十三日夜汎月太湖

為愛清秋月中流
獨扣舷艱難羣盜
路寂寞五湖船白

髮從今夜青山憶往年酒闌愁不寐相顧意茫然

十七日夜月

待月良宵靜更深醉玉缸空城懸北斗流水入西江落
葉紛無數驚鳧起一雙高樓思蕩婦茲夕定當牕

旅興呈舍人五兄二首

舊宅烏衣巷涼秋白苧歌湖山歸路遠風雨閉門多暗
壑隱松桂深潭漂菱荷美人日遲暮芳草奈愁何

旅館三秋客端居百慮違張衡長不樂王粲竟無依夜

月彈長缺涼風嘆短衣天涯芳草盡我馬亦懷歸

寂寞行

寂寞復寂寞四壁歸來竟何託
男兒不肯學干時終當
餓死填溝壑布衣甘蹈湖海濱
饑來乞食行負薪不然
射獵南山下猶勝長安作貴人

九日同張

興繆永謀

集錢

汝霖

宅分賦

魯酒飲未醉商歌調復勞
百年齊下淚九日罷登高
短髮參軍帽重寒范叔袍
舊來飛動意空羨五陵豪

旃蒙協洽

謁廣陵侯廟并序

錢塘江干有廣陵侯廟其來古矣乙未三月將之越中
問渡展謁廟下按枚乘七發觀濤於廣陵之曲江世疑
廣陵國為今揚州府治然元李錢思復試羅刹江賦證
曲江即浙江楊廉夫避之時号曲江處士而曾子固撰
越郡趙公救災記中有廣陵斗門合之伍子之山胥母
之場疑義可析因賦絕句紀之江月松風者思復自題

其集名也

昔聞江月松風客賦證錢塘是曲江不見郊關廣陵廟
靈風長拂舊幡幢

固陵懷古

越王此地受重圍置酒江亭感式微想像諸臣紛涕淚
淒涼故國久睽違天寒竹箭參差見日暮烏鳶下上飛
猶羨當年治吳日六十君子錦衣歸

蕭山道中

古樹參差暗春禽旦暮鳴東西開水市高下築山城翠
竹千家靜清江二月平昔賢栖隱地巖壑有同情

梅市

仙吏經過處空江日夜流何年市門去千載渺難求竹
暗清溪路沙明白石樓羈鴻與孤客歸思兩悠悠

鑑湖

狂客當年歸四明經過遺跡不勝情澄湖一曲明如鏡
身在山陰道上行

雨坐文昌閣

芳草辭南浦晨風寄北林佳人天路隔帝子水雲深風
雨他鄉別羈愁薄暮心冬青已無樹忍向六陵尋

偕謝

晉吳慶禎

登倪尚書衣雲閣

閣初成日倪公讌漳浦黃

此公於

飛樓跨百尺畫棟長氤氳我來偕客一延佇置身髣髴
雲中君憶昔樓成時尚書歸田里北海方看尊酒開東
山終為蒼生起自從龍馭歸鼎湖公亦仗節死京都子

規燕市尋常見白鶴遼東歲月徂十餘年間亭已壞游
客經過增感慨噫吁嘻黃公授命大中橋魂兮欲歸不
可招千門白下總蕭瑟何況尚書一廛室請君下樓歌
莫哀回首高城月東出

謁大禹陵二十韻

夏后巡游地茅峰會計時雙圭開日月四載集輜標國
有防風戮書仍宛委披貢金三品入執帛萬方隨相古
洪流割欽承帝曰咨寸陰輕尺璧昆命有元龜自授庚

長籍寧論癸甲期清都留玉女惡浪鑠支祁荒度功攸
賴平成理自宜神姦魑魅屏典則子孫貽明德由來遠
升遐亦在茲丘林無改列弓劍祇同悲回首辭羣后傷
心隔九疑烏耘千畝徧龍負一舟移斷草山阿井空亭
嶽麓碑芒芒懷舊跡肅肅禮荒祠黃屋神如在桐棺記
有之筵誰包橘袖隧或守熊羆共訝梅梁失因探窈石
遺竭來憑弔處拜手獨陳辭

南鎮

稽山形勝鬱岵嶮南鎮封壇世代遙絕壁暗愁風雨至
陰崖深護鬼神朝雲雷古洞藏金簡燈火春祠奏玉簫
千載六陵餘劔烏帝鄉魂斷不堪招

晚過寶林山寺

相傳山自那耶東武海中
一夕飛至人民皆徙焉

春風從何來吹彼芳樹枝客心坐惆悵日夕千里思出
門異南北獨往任所之眷言登茲山已見西日馳羣峰
趨戶外出沒成參差置身空濛間恍惚飛來時向下聽
雞犬極視窮高卑沉沉西林路光閨從此辭回瞻白雲

金三ノ二ノ三ノ
卷三
合林外鐘聲遲

遶門山

修途緣廣隰川暝高煙平迨迨前山路落日西林明舍
舟復登陸慰我巖壑情斧斤山林外白石丁丁鳴危梯
懸木杪幽谷聞人聲陰晴古壁暗高下蒼崖傾或見山
火出時聞猿鳥驚平看雷雨黑下視源潭清微風吹素
浪日夕沄沄生山田足禾黍水石明柴荆何年此幽棲
深謝世上名無為在城市戚戚多所營

舟中望柯山

朝光麗華薄清川蕩浮瀾
棹臨江臯流目肆遐觀
丹葩眩重谷素雲冒曾巒
我行既遲迴顧景多所歡
青林翳巖桂香風過崇蘭
空亭邈孤高修竹自檀欒
緬懷古之人知音良已難

蓬萊閣晚望

源水桃花樹樹春
燕子家家目斷江南歸
思愁人不
在天涯

再過倪尚書宅題池上壁

尚書池館古城邊
卷幔山光繞座前
一自鼎湖龍去後
難期華表鶴歸年
石廊細雨生春草
蒿里悲風起墓田
枉付尼師作精舍
粥魚茶版此安禪

若耶溪

若耶溪頭春水深
南風北風樵采音
浣紗女兒不得見
清江日暮愁人心

戴山亭子

石磴層層上憑高四望同君王遺跡在寂寞古亭空綠
水人家外青林島嶼中昔年生聚日辛苦舊江東

弔王義士

毓著王義士受學于都御史劉公宗周公聞南都不守乃絕食義士上書

于公曰慎勿為王炎午所笑乃衣儒巾藍衫投柳橋下死與義士先後死者潘生集周生卜年

中丞弟子舊家風杖屨相隨誓始終閉戶坐憂天下事
臨危真與古人同短書燕市遺丞相餘恨平陵哭義公
此地由來多烈士千秋哀怨浙江東

岳忠武王墓

宋室偏安日真忘帝業艱但愁諸將在不計兩宮還鄂
國英雄士淮陰伯仲間策名先部曲薄伐自江關赤縣
期全復黃河度幾灣龍庭生馬角雪窖視刀鐐城下盟
何急師中詔已頒盈庭尊獄吏囊木謝朝班相狡妻煎
煽和成主愈辱長城隳道濟大勇喪成觀舊井銀餅失
高墳石虎間銘功存版碣鑄像列神姦曠世心猶感經
過淚獨潛傳聞從父老流恨滿湖山朔騎頻來牧南枝
尚可攀墓門人寂寞江樹烏緡蠻宿草經時綠秋花滿

目斑依然潭水月終古照潺湲

表忠觀

城邊碧玉樹靈旂廟口明湖濯翠微
罷聽緩歌歸夜月獨存豐碣對閒扉
錢塘白馬迴犀弩玉座青苔上錦衣
保障東南功不細祠官異代豈相違

歸

江南春事早二月已飛花
眼見芳菲盡吾生信有涯
妻兒空待米風雨獨歸家
自斷無長策何勞感歲華

橫山蛟潭

雲根鴈齒階旁覩怪石裂傳聞此山隅有蛟出自穴崖

傾箭栝門水暗玄黃血不見下山人怡悵芳菲節

山為顧况

舊居有讀書臺下山歌云日日
兮春風芳菲兮欲歇况所作也

歸次西小江行舟被捉夜宿蔡村田舍二首

石壕逢小吏日暮捉人船
斷續清江樹冥濛細雨天
一

身無倚著三命苦
迤邐並把迷津問
蕭山何處邊

野老原頭立逢迎
禮數增江村寒抱被
茅屋夜張燈
兵

革愁何極桑麻話未能為言官道近一舍是西興

擬古折楊柳辭

手折楊柳條倒樹孟津河十年來繫馬楊柳今漣娑

同作

山陰

祁班孫

上馬不執鞭但折楊柳枝出門不垂淚但歌楊柳辭

對月簡周賀繆永謀

楓林初落日秋露漸沾牕仰視明明月遙臨湛湛江游
思陶謝並客有阮何雙待發清溪權相要醉玉缸

柔兆浥灘

山陰道歌送沈十二進

我從山陰來却憶山陰道客舍高歌一送君江南愁思
盈芳草芳草碧迢迢離人千里遙青山謝公屐白馬伍
胥潮潮來潮去春江路行車遠發西陵渡雲暗清溪梅
市空風吹修竹柯亭暮迤邐鏡湖邊中流記采蓮樵風
空舊跡沉釀自成川誰家青翰長相見何處紅妝不可
憐溪風橋雲門寺流泉淙淙石齒齒我昔愛奇未到此

送君遠遊從此始直上秦山望海水

送舍弟昇鑿之山陰

別情不可道送汝益淒其分手悵前路離居感後時山
中伯禹穴江上伍胥祠何處無芳草池塘遶夢思

午日吳門觀渡

勝日銜杯罷輕舟解纜初盡傳迎伍相不比弔三閭畫
舫龍鱗見飛樓蜃市居雲濤看震盪雷雨任吹噓別有
張筵客相邀吳市墟王孫五花馬少婦六萌車芳樹晴

川外平沙夕照餘，泉聲間絲竹，人影亂芙蓉。為樂時將
晚，當歌恨不除。閭閻成土俗，天地感權輿。江表遺風在，
承平舊事虛。吾生多涕淚，高會輒欷歔。

將遊嶺南留別故園諸子

驪駒長路起秋塵，遠客清樽不厭頻。握手相看猶未醉，
滿堂明月照離人。

錄別

飄飄山上雲，泱泱溝中水。居人語前除，行子夜中起。攬

衣候雞鳴束帶復隱几上堂辭嚴親入室慰妻子戚戚
對弟昆依依向鄰里臨當掩柴扉行復顧桑梓睽彼雙
飛鴻徘徊不能已

金山登妙高臺

高臺堪極目落景一登臨衆水金陵下孤城鐵甕深平
沙依鴈宿橫笛想龍吟不見安禪叟寥寥江上心

秣陵

秣陵城闕暮雲封估客帆檣落日逢萬里星霜沙塞鴈

五更風雨掖門松長江鐵鎖空千尺大道朱樓定幾重
此夕愁人聽鼓角驚心不似景陽鐘

采石

采石磯邊積雪晴橫江館外暮潮生金陵美酒百斛盡
明月滿江空復情

小孤山

北船乘長風南船載柔櫓篙師戒晨征渡口動津鼓霧
淨開孤峰沙明橫極浦逶迤經前山日色未亭午半嶺

界樓臺參差近可覩
離離金碧光
窅窅神靈雨
遠望空
愁心沿江采芳杜

大孤山

兩孤去百里宛在中
流半匪獨形勝殊
氣亦變昏旦天
梯鬼斧開廟火神鴉散
昭昭雲月輝
歷歷明星爛
空水既澄鮮
浮光亦凌亂
飄颻御冷風
恍忽度銀漢
未有歸與情
空深逝者歎

舟中望廬山

昔子志名山夢寐五老峰今茲遠行邁舟楫欣來逢中
流望員闕隱見金芙蓉空翠非一色飛雲渺千重歷歷
澗中水青青崖上松所嗟限于役策杖誰相從空愁石
梁在緬懷虎溪蹤巖棲不得遂惆悵東林鐘

望湖亭對月

山色匡廬近湖光彭蠡開異鄉頻見月孤客乍登臺遠
樹霧中失浮雲川上來離心似黃鵠中道一徘徊

封谿鼎侯廟

返照封谿上，停橈思惘然。
地傳白鹿渚，人記赤烏年。
簫鼓迎神曲，帆檣送客船。
誰令戎馬日，萬里入南天。

灘行口號六首

白鷺洲前動客愁，黃公灘畔駐行舟。
誰開瘴嶺天邊路，惟見清江石上流。

銅盤灘急水西東，兩岸高山四面風。
絕壁倒飛巫峽雨，懸流直下呂梁洪。

黃茅峽外野人居，潭影空明漾碧虛。
長箭短衣朝射虎，

鳴榔持火夜驚魚

斷壑陰崖百丈牽斜風細雨萬山連長年三老愁無力

羨殺南來下瀨船

紅霞深樹嶺雲平兩槳戈船石罅行浦口清猿催客淚
一時齊作斷腸聲

羊腸鳥道幾千盤設險寧惟十八灘見說一灘高一丈
直從天上望南安

虔州懷古

橫浦樓船靜西風草樹彫城荒百戰在地入九江遙豪傑爭先後山陵慘寂寥鬱孤臺下水流恨自南朝

南安客舍逢陸郡伯兄

世楷

以滕王閣詩見示

漫賦

憶昨君從柘湖至揚舫爭發吳趨市京口相逢借問君
槩舟揚子江心寺晴雲縹緲散碧空歛忽破波生長風
孤舟如巨魚鼓鬣洪濤中川原迢遞不可極布帆飄忽
隨西東我從鹿渚超長溥君到洪都更棲泊遠望開襟

彼一時憑高獨上滕王閣茲樓崛起天下雄珠簾繡柱
垂文虹當年王師此高宴一時詞賦推羣公留題真蹟
不可見煙雲過眼須臾變古來文采光燄長千載王郎
信堪羨君家兄弟才難伍甫里聲名動江左揮毫落紙
氣凌雲坐令長才失千古我亦天南萬里行白衣搖櫓
度江城閒雲潭影徒回首南浦西山空復情大庾城邊
日將酉下馬逢君復攜手座上新開北海樽客中飲我
蘭陵酒酒闌相示絕妙辭九莖勝食齋房芝曲終定有

湘娥怨讀罷如聞帝子悲
當前勝地不得上使我沉吟
一惆悵舟楫重過定幾時
雲山滿目知無恙明發梅花
嶺外看長從驛使報平安
側身天地多知己且莫頻歌
行路難

度大庾嶺

雄關直上嶺雲孤
驛路梅花歲月徂
丞相祠堂虛寂寞
越王城闕總荒蕪
自來北至無鴻鴈
從此南飛有鷓鴣
鄉國不堪重佇望
亂山落日滿長途

涇陽峽

吳山多逶迤，粵山獨嶄崿。壁立千仞餘，洞壑俯穹嵌。子
午見日月，朝夕鳴松杉。天風一以至，蕭瑟吹江帆。懸崖
答長嘯，空翠濕征衫。側聞飛仙度，遠見浮雲銜。何當斲
靈藥，坐惜無長鑱。

香爐峽

何年香爐峽，擅此香爐名。匡廬與會稽，秀色同削成。篁
徑散彩翠，溪流澹澄明。青雲結車蓋，白日懸霓旌。孤舟

泛容與百丈紛縱橫人影如沙蟲
林林川上行夕陽下長坂猿鳥盡
哀鳴征途渺何極惻惻使心驚

大廟峽

連山何迢迢迢迢夕陽外我行曾幾時
虛舟入青靄崖傾斷車箱廟古陰松檜
遙見靈旗翻微風響清籟川光與天容
上下如衣帶纍纍白石明窅窅浮雲晦
日夕故鄉心山川渺吳會

羚羊峽

泠泠高峽水際曉煙光微一聞征撓發宿鳥皆驚飛浦
樹旣迢迢山雲亦依依谿迴修竹靜日出行人稀雙崖
信奇峻屹立如重圍猿狖相叫嘯水石湛清輝遂令游
子心萬里亦忘歸林棲如可得願息漢陰機

寄遠

南風日夕度江潭旅夢還家路未諳寄語寒衣休憶遠
更無霜雪到天南

強園作靈

元日陰

黯黯窮陰合蕭條歲序遷故鄉應雨雪絕域尚烽煙更
憶高堂上頻思遠信傳辛盤空自好誰為介樽前

首春端州述懷寄故鄉諸子

客舍千山外春城萬里心草青仍一度雲暗結重陰往
事隨蓬轉謀生愈陸沉承歡違菽水兄弟渺商參負米
情空在離鴻思不禁此邦非樂土何處好懷音枉作窮
途哭虛勞澤畔吟蒼梧晴峽遠桂水暮流深夢斷梅銷

嶺囊空陸賈金楓林悲落月苔石憶同岑
燕笑應如昨
沉吟獨至今北歸徒躑躅南望益蕭森
瓊樹佳人隔梅
花驛使臨短書知可報珍重問江潯

珠江午日觀渡

蠻歌撫節下空江畫舸朱旗得幾雙
想像戈船猶漢日
忽驚風土異鄉邦芙蓉遠水迷花渡
琥珀深杯覆酒缸
近市青樓經亂盡知無紅粉出當牕

五羊觀

中天臺殿倚南溟，玉珮雲衣散百靈。
瘴雨不開煙樹黑，驚濤直下海門青。
騎羊舊說朝天馭，銜穀何年降楚庭。
歎息遺墟今寂寞，高林空度羽人經。

蓬軒落成曹方伯

落

招飲納涼即席分韻

卷幔溪光夕，開軒露氣澄。
參差交月樹，升降護風燈。
幕府容疎放，蠻天罷鬱蒸。
南園多勝友，況挹酒如澠。

羊城客舍同萬

泰

巖

焯陳子升

薛

始亨

醉賦

客舍所居堂勝侶，時相求興來攜手。
一展眺，恍如孫楚。

之酒樓樓頭取酒恣驪謔遠勝十千宴平樂海寺鐘聲
風末聞江城帆影樽前落夕陽飄忽晴滿林須臾急雨
來庭陰蠶天五月不知暑座客相看寒已深我本蘆中
人易下新亭淚莫辭魯酒薄拚作高陽醉出亦復苦愁
入亦復苦愁黃河之清不可俟何用長懷千載憂陳拾
遺嚴夫子羅浮四明兩道士意氣寧從杯酒生文章本
是千秋事況今生涯羈旅中時危得不悲途窮丈夫三
十不自立一身漂泊隨秋蓬雖未白頭成老翁當前有

酒且痛飲明朝岐路仍西東

同陳五子升過光孝寺

浩劫虞翻宅沙門大士居
寒煙萬井外春樹六朝餘
是日風幡動諸天夕照虛
更尋濠上樂偶坐一觀魚

越王臺懷古

君不見越山高高越臺古
複道逶迤接南武北望山頭
徧白雲西臨城下環珠浦
由來形勝盡高丘萬里天南
此壯游驚濤暗向扶胥落
佳氣晴連鬱水浮憶昔中原

逐秦鹿五軍失利屠睢戮番禺一出王衡山戶將從征
入函谷天教霸象開南溟宵分東井聚五星龍川縣令
起嶺表被書移檄馳邊庭聲言三關盜兵至一時按法
誅秦吏萬人既築湏陽城千里還開雒王地漢帝當年
為剖符陸生燕喜出西都冠裳雖結須臾變文錦蒲桃
絕世無番禺之交一都會因山築臺落天外百丈迴盤
信壯觀三時朔望長升拜自古羈縻稱外藩誰令市鐵
禁關門不見鮫魚重入貢旋看黃屋自言尊漢使陳觴

更行樂紫貝明犀雙孔雀重來錦石已成山歸去黃金
遂盈索一從蒟醬啟唐蒙越騎校尉甘泉中是誰僂殺
棄繻者江淮巴蜀紛來攻伏波下瀨軍三石樓船戈船
齊教戰合浦珠崖隸海隅山薑扶荔移深殿尉佗城圯
夕陽原建德園荒秋樹根虛傳避暑游宮闕幾見浮杯
出石門木棉花開山雨積鷓鴣啼處蠻煙碧舊井潛移
郭璞城離宮半入虞翻宅人事消沉洵可哀千秋朝漢
餘高臺漢家遺蹟不可問吁嗟乎歌風柏梁安在哉

東官書所見

浦樹重重暗郊扉
戶戶關長年搖櫓
至少婦采珠還金
齒屐一尺素馨花
兩鬟摸魚歌未闕
涼月出雲間

贈張山人

穆

鐵橋山人逸興長
草堂卜築東溪傍
彈碁擊劍有奇術
飲酒賦詩多樂方
逢人豈憚霸陵尉
畫馬不數江都王
莫道雄心今老去
猶能結客少年場

贈張五

家珍

可歎張公子流離自妙年身孤百戰後門掩萬山前
易下窮途淚難耕負郭田平陵松柏在餘恨滿南天

贈高儼

高生老畫師往往賦新詩能事由來重狂歌和者誰
飲知犀首好情識虎頭癡不向銅鞮去尋常倒接羅

哀莫處士

以寅

濃花細雨落前簷憶別江樓暮卷簾今日天涯同調盡
白揚荒草哭陶潛

食龍目

龍目原奇樹嘉名自海區何年賦旁擬得與側生俱黃
擬支郎眼圓分漢女珠幾人曾嗜此昌歎未應殊

送曹方伯還里

惆悵紅亭酒登艫奈別何秋風空日夜岐路渺關河重
以歸與歎因之勞者歌還憑長短笛吹出感恩多

夜泊西南驛

生煙平楚夕隱隱見西南獵火寒歸騎津亭暗落帆往

來仍嶺外憔悴即江潭縱有還家夢愁多已不堪

三水道中

浦樹高原盡人家負郭稀夕陽明斷塔風色上征衣老
馬長途伏飢鷹側翅飛寒江日西下不送北船歸

崧臺晚眺

傑閣臨江試獨過側身天地一悲歌蒼梧風起愁雲暮
高峽晴開落照多綠草炎洲巢翠羽金鞭沙市走明駝
平蠻更憶當年事諸將誰同馬伏波

七星巖水月宮

晨策遵北渚初暎麗陽崖
淒清曾颺發鬱述素雲靈橫
術越故蹊交林冠高齋蒼煙秀
松果白石崇基階以茲
清曠地結念澄中懷
瑤琴雖無音山水調長諧
何必答
獻歌魚鳥即朋儕
懷新意猶眷撫往迹誠乖
即事非浮
歡真樂亮難偕

入景福洞登璇璣臺

紺宇陟旣窮靈域探未竭
援蘿巡傾崖窺巖辨修碣滅

跡超重深拂衣避硨磲入窞驚坎習出泉自蒙發洩雲
晴未歸石火寒不伐吹萬聆天風明兩見日月芳塵凝
花堂象緯逼金闕陰澗待息心陽阿足晞髮歲晏當來
游毋令蕙草歇

由香關至玉虛觀遂轉登絕頂

山行不辭勞況非道路長石門敲層阿沙草敷陽岡仄
徑旣窈窕連峰復青蒼登高矚千重矯首凌八荒飛鳥
遺之音埃風吹我裳覽彼終南詩有紀亦有堂亭亭翠

旗列宛宛朱鳳翔
忘憂豈在邇為樂
誠多方何當啟閭
闔高舉朝紫皇

下扶嘯臺陟閭風
崖自蓬壺徑汎舟
入鐘鼓洞高寒肆
冥搜幽異愜心賞
窮梯背樵蘇密徑
面篠蕩睇後路既
迴瞻前渚彌枉緬
辭蘇門嘯重作剡
溪訪泉石匪自今
亭臺已成曩其鐘
異短聞無射中奇
響偉茲造化功流
形信无妄津逮興
故超神淵道斯廣
懷哉謝人寰歸與
授吾黨

阻風珠江口漫成十韻

疾風江上起舟楫盡停撓靜聽千林折驚傳百丈啣飛
鳴連鴈落高下斷蓬飄急鼓峒人伐殘虹颺母驕土囊
愁岌業板屋嘆漂搖望入孤城近真成一水遙空倉寒
聚雀深樹晝聞鴉長短誰家笛東西背郭樵驅馳嗟異
域搖落感今朝惆悵王孫路懷歸不自聊

送嚴焯之惠陽

相期且樂酒相見輒悲歌相送有如此相思知若何晴

川疎樹遠落日亂山多別後豐湖月聞鐘應獨過

鬱洲寒望

一丘迴枉渚獨往失斜曛到地無南雪連天有朔雲
泉懷刺史蠻語問參軍漸聽寒潮落昏鐘隔浦聞

曝書亭集卷三